

## JAINKORAKO MAITE-LELOA

### Emazteak

Non zaude kuku, Maite?  
Emen nuzu mingulin.  
Oreiñak antzo, iota  
nadukazu maitemin.  
Atzetik oska nuzu,  
ta Zuk neri aldegin.

Sarobitik muñora  
ardien zai oana,  
baldin ikusten ba duk  
nik maiteen dudana,  
esaiok nola nagon  
min, illun, ill-urrana.

Zure billa niazu,  
piztien bildur gabe  
ez loreak biltzera,  
mendira, ibarrera,  
arresi ta gaztelu  
bizkor igarotzera.

Oi nere Maite orrek  
landa zaituten oian  
eta basoitsuak,  
esaiadazute, esan,  
belardi loretsuak,  
emendik igaro dan!

### Izakiak

Ariñ igaro zaigu  
zoramen dariola,  
ta begiratu utsez,  
gu ikusiz doala,  
daukan edertasunez  
apaindu gaitu ola.

### Emazteak

Ai, nork senda nazake!  
eman zakit egitan!  
Ez ibili geiago  
neri mandaritan,  
ez dakite mintzatzen  
nik nai nuken neurritan!

Andik emendik, Zure  
zoramen esanekin  
zauritzenago naute  
eziñ-esanarekin:  
iltzear nadukate  
mar-mar totel orrekin!

Zelan bizirik irau  
ez-leku ontan biziz,  
eta maite-geziak  
amuts geldieraziz,  
Arek egin-ukitu  
guziak illeraziz?

Zauritu baitidazu  
biotz au, esaidazu,  
ez al duzu sendatzen?  
Lapurtu ba didazu  
orrela utzi gabe  
lapurtu au ar zazu!

Arren, begion argi,  
ez eduki mingarri  
nereok, senda itzezu  
zaitzaten ikusgarri,  
Zutzat bakarrarentzat  
nahi ditut ekarri!

Maitemiña sendatzen  
ba-dakit neke dala;  
aurpegi eder ori  
agertu dakidala!  
Zu begiz ikusteak  
erioz il nazala!

Oi iturri gardena!  
zillar-leiar orretan  
agertuko ba lira  
nik nere erraietan  
irraririk dauzkadan  
begi oiek bet-betan!

Ken, Maite, baniazu  
egan.

### Senarrak

Itzul, usoa,  
orein zauritu onek  
gaindituko du muñoa.  
Zure egal oietatik  
arturik otzaroa!

### Emazteak

Nere maitea!: baso,  
zelai gorde, oiantsu,  
urrutiko izaro,  
erreka txurrutatsu,  
aize maiteen xixtu:  
ori eta are zera Zu.

Gau ixil paketsua,  
goiz argitik urbilla,  
bakardi ozenean,  
musikaren ixilla,  
maitasuna dakarren  
apari zuzpergilla!

Matsa lore daukagu,  
ta axariak atzeman,  
egin dezagun xorta  
arrosaz bitartean,  
ez baita nabariko  
iñor gure landetan

Ixo! Ipar, erio!  
Ego, maite-ekargarri!  
io nere baratzean  
usaien zabalgarri;  
an aseko Maiteak  
loreetan egarri.

Iudar neska-lagunak!  
lili ta arrosa artean  
usai onek dirauño  
zaute aldamenean;  
arren, ez egin oles  
gure etxeko atean!

Kuka zaitte, Maiteño,  
menditara begira,  
gorde ixil-gordea,  
neska-lagunak dira  
izaro galduetan  
dabillanaren billa.

### Senarrak

Arren, egazti ariñ,  
leoi, orein txantxari,  
ibar, mendi, ugalde,  
euri, aize, sargori,  
esnai ta amets artean  
gau latzaren zaindari!

Sirenan zora-kantuz  
dagizue arago,  
gorde asarre ori;  
ez txintik ein geiago  
andregaiak lo egin  
dezan seguruago.

Sartua da Laztana  
gogo zun baratzean;  
bere gogara datza  
loa, bete-betea,  
lepoa makurturik  
Maiteren besartean.

Elkartuak gaituz  
sagar-ondo azpian,  
an, eskuak emanez  
senar-emazte giñan;  
osasuna arki duzu  
amak galdu tokian.

### Emazteak

Gure oia lore da,  
leoi-zuloz ertsia,  
egin dezagun iñaurrik,  
pakeak eraikia:  
bizkorren iskiloez  
inguruan iantzia.

Zure urratsen segi  
neska gazteak doaz,  
txinpartak ukituak,  
birbiz, on dan ardoaz,  
biotza bizkorturik  
lainko-usai gozoaz.

Maiteren ardangelan  
edana naiz barnean;  
berriz landa ontara  
atera nintzanean,  
saldoa galdu nendun  
ezer ez oroitzean.

An eradoski nindun  
iakite txit guriaz;  
an eskeñi nintzaion  
nerau, dudan guziaz;  
bere nindula agindu  
nion, danak utziaz.

Anima, dudan oro  
eman nion mendeko;  
enaiz geio saldo-zai,  
ez dut deus egiteko;  
ontarako bakar naiz:  
Maitea maitatzeko.

Aurrera larraiñean  
ikusten ez nautela,  
esango dute, noski,  
maitez galdu naizela:  
galgarri nintzalarik  
irabazi nutela.

Goiz otzean bilduzko  
lore ta pitxiakin,  
egingo dugu xorta  
Zure maitasunekin,  
eta nere buruko  
ille eio batekin.

Lepoan egan bakar  
nik nenkarren illean;  
so zenegion eta  
bertan lotu ziñean;  
zauri ziñan erori  
nere begi batean.

Begi oiek neretan  
eder ziran ixuri;  
hala nintzan txit maite,  
ala zuten merezi  
zuretan zekustena  
nereetan iauretsi.

Ez esker gaitzo neri,  
nitaizulako beltzun;  
so egidazu, beintzat,  
begiz io baininduzun,

ederrez, zoramenez,  
apain iantziz ninduzun.

### Senarrak

Ba-dator uso txuri  
mokoan muskilakin  
kutxara; uxapala  
maite zeukan Arekin  
urondo urdiñetan  
batu dira alkarrekin.

Bakarrean bizi zan,  
bakarrean kabia  
egin du, bakarrean  
du maite gidaria;  
bakartasun aretan  
artua du zauria.

### Emazteak

Maita igun elkar, Maite,  
goazen oian-barnera,  
Zure edertasuna  
mendian ikustera,  
muñolari darion  
uretik edatera.

Andik gorago dauden  
artzulo gordetara,  
aietan bi-biñook  
ixil sartuko gara,  
ta puni-sagardoa  
dedakegu gogara.

An erakutsiko Zuk  
nik gogoan dudana,  
emain ere didazu  
—nere bizi zerana—  
aurreko egun artan  
an eman zenidana.

Aizearen arnasa  
txindorraren txioa,  
izar dagon gauean  
inguru on-giroa,  
min gabe erretzen dun  
sugarraren lanboa.

Etzegon iñor beira,  
Txerren leize zuloan;  
esi-barrua pake  
iabalean zegoan,  
eta zalditeria  
ur-begitik zihonan.